

I

Panihapon




Ang tanan nakibot kay
Sa tunga tunga sang
panihapon
Nga iya ginpreparar,
Si Nanay naghambal –
Nagayuhom, nagahugyaw
Sa desisyon nga magtudlo
Liwat, pareho sang una.
Nga gusto obrahon
Ang pinalangga nga
propesyon -
Mabug-at nga responsibilidad
Misyon sa Simbahan, Ang
mangin katekista.
Wala man manibag-o
Si Tatay kag mga bata
Kay tungod pirme man siya
Sa simbahan.
Ang hambal ni Tatay,
“Indi lang kami
Pagkalimti, indi
pagpatumbaya-an”.
Hambal ni Nanay,
“Indi man Ga, ah,
Kamo man gyapon ang una
Ko nga katungdanan”.
Sa manami nga panihapon
Kag pagkatapos magkaon,
Kag pagkatapos magkaon,
Si Nanay pa gihapon
Nagpanghimos,
nagpanghugas.
Amo ini ang ika-una nga
Krus sa dalan
Sang katekista nga alagad,
Mapuslanon nga paghalad.

II

Getsemani

Antes nagsulod
Sa pangangkat sang
katekesis,
Si Nanay nagtambong
Sa kada semana nga pagtuon
Nahanungod sa bibliya,
Sa mga katesismo nga
dokumento
Sang Katolikong nga
Kristiyano
Kag Katolikong nga Pilipino.
Indi nangin hapos
Ang pagpamati liwat
Sa pari nga katekista
Kag sa mga direktor sang
katekesis
Kay tungod mas mabudlay
gali
Ang mag tudlo
Sang ginatudlo sang
Simbahan.
Nga kaparehas sang
pagpangamuyo
Ni Hesus sa Getsemani,
May pag-antus nga kaupod
ang pagpreparar
Para ang tunay nga kina-
adman
Mapa-ambit man sang tunay.
Amo ini ang ikaduha nga
Krus sa dalan
Sang katekista nga alagad,
Mapuslanon nga paghalad.

**III**

Sanhedrin




Sang masinadyahon nga
ginbaton
Ni Nanay-Teacher,
Ang bag-o nga katekista,
Ang iya katungdanan nga
magtudlo
Sa pampubliko nga
eskwelahan
Gin-preparahan gid niya ang
mato nga adlaw
Pag-kadto sa eskuwelahan
Pag-atubang sa principal
Para batunon ang iya skedyul.
Apat lang gid ang pwede
pilian:
Ang pinaka-timprano sa aga,
Ang tunga-tunga sa
reses,
Pagkatapos panyaga,
O sa hapon antes magpuli.
Kaparehas ni Hesus
Sa atubangan sang
Sanhedrin,
Mapa-inubuson
Sa atubangan sang
gamhanan
Wala man reklamo
Para mapadayon ang misyon,
Bisan ano nga oras,
Katesismo matuman.
Amo ini ang ikatatlo nga
Krus sa dalan
Sang katekista nga alagad,
Mapuslanon nga paghalad.


IV

Korona nga Tunokon

Sang una nga pag-tilaw
May dala nga kalipay
Ang kada adlaw
Sa misyon nga mag katekesis
Sa mga bata nga malangas.
Ugaling sa paglipas sang mga
inadlaw,
Nakita sang katekista
Ang amat-amat nga pagkadula
Sang interes sa pagpamati
Sang mga bata nga may gina-
kulo,
Ang ila mga mata maluya
Kay ang ila gali
Pangabuhì gina-pabudlay pa
gid
Sang mga problema sa
balay:
Wala gasimba nga mga
ginikanan,
Wala trabaho, Nagbulagay,
indi kasal.
Ang katekista
daw Ginpurongpurongan
sang korona
Nga tunokon nga lusot sa
taguipusu-on,
Kay tungod daw indi hamtong
Ang paghangop sa sakramento.
Katekesis ila kinahanglan.
Amo ini ang ikaapat nga
Krus sa dalan
Sang katekista nga alagad,
Mapuslanon nga paghalad.

**V**

Krus




Sa adlaw-adlaw may krus
Nga ginapas-an ang katekista
nga
Alagad sang Simbahan.
Sa balay pa lang, una nga
Katungdanan gina-tuman
Kag dali-dali dayon nga magla-
ong
Agud sa gilayon makadtuan
Ang mga bata nga gahulat
Sa eskuwelahan.
Maka-abot man gihapon sa
padulungan
Bisan ang plete kulang,
May mahimo guid nga paagi.
Bisan ang pambakal sang
chalk
Kag papel nga paga gamiton
Katekista ang magpatigayon.
Bisan ano pa nga kantidad,
Bisan hambalon pa nga
tinonto
Kag wala pulos.
May kabudlay man nga upod
May sakripisyo kag pag antus
Pagbaton sang krus
Misyon nga katekesis.
Amo ini ang ikalima nga
Krus sa dalan
Sang katekista nga alagad,
Mapuslanon nga paghalad.

VI

Pagkadagpa

Bangud sa kapin-ot sang
kakapoy
May tini-on guid nga
Ang katekista gakadagpa
Gamasakit, nagapangluya
Ang buot. Gina-batikos.
Ginapakalain sang amigo
kag amiga,
Ginahambalan nga
salimpapaw,
Ginakuno nga wala pulos
Ang pangabuhì indi
Santo sa ginatudlo
Bilang isa ka katekista.
Ang kaluya matuod guid,
Indi ini tili-awan,
Kay kamatuoran sang
kabuhì
Ang pagpalagyo sang
kusog
Asta nga ang tanan-tanan
Sa Diyos nga
Makagagahum matugyan!
Amo ini ang ika-anum nga
Krus sa dalan
Sang katekista nga
alagad,
Mapuslanon nga
paghalad.

**VII**

Simon Sireneo




Sa tini-on sang
pagkinahanglan
Nga may kaangtanan sa pag
katekesis
Madamo sang Simon
Sireneo-
Mga but-anan nga tawo
Sa katekista nagatabang.
Halin guid sa mga Tatay
Kag sa iban pa nga kaupod
Sa panimalay,
Libre nga guinadul-ong
Si Nanay nga katekista
Sa bisan ano nga
pagtililipon,
Kag libre man nga ginasugat
Pagkatapos sang meeting.
Lakip man diri ang mga
Kaupod nga katekista
Kumare kag abyan,
Insigida nagapa-utang
Bisan madugay, pa
mabayaran.
Ining misteryo nga misyon
Kung ngaman indi guid
mabayaan
Ang pagka-katekista
Sang teacher nga Nanay.
Amo ini ang ikapito nga
Krus sa dalan
Sang katekista nga-alagad,
Mapuslanon nga paghalad.

VIII

Pagsugataay

Ang pagka-katekista,
Bisan napun-an sang
sakripisyo
May dala man nga kalipay
Tungod sang misyon nga
ginatuman.
Madamo dabi sang
nakasugata
Nga pirme gapamangkot gani
Ang pat-od nga sabat
Bitbit mo guid dapat.
San-o ang bunyag?
San-o ang kasal?
Sin-o magpakumpisar?
Ang komfirmasyon san-o
gani?
Sa diin ang prusisyon?
Ngaman wala si Padre?
Sa diin si Padre?
May kasal si Padre?
Pwede makapa-bendisyon
Bisan siesta pa ni Padre?
Mini ang mga impormasyon
Nga daw sa obligasyon mabal
-an
Sang katekista nga
Sa Simbahanmakita pirme.
Amo ini ang ikawalo nga
Krus sa dalan
Sang katekista nga-alagad,
Mapuslanon nga paghalad.




IX

Gilansang



Pagkatingala ang dala
Nga ginhatag sang
nalansang sa Krus
Nga si Hesus sa kada
pagtililipon
Sang mga misyonero nga
katekista.
Nangin tima-an sang
pagdumdum
Sang Amay, sang Anak
Kag Espiritu Santo.
Nagapahanumdom sang
sakripisyo nga
Nagsagup sa mga sala
Ang mga lubid nga nabalu,
Sa paghigugma nabungkag,
Ginpuno sang pagpalangga
Ginpalupok ang mga ugat
Para ang dugo magbulwak
Nagsumbong nga
mahidaiton,
Wala guid sang dumot,
Paghigugma nga bug-os
Sang nalansang nga si
Hesus
Sa katekesis amini
ang pinaka-unod.
Amo ini ang
ikasiyam nga
Krus sa dalan
Sa katekista nga-
alagad,
Mapuslanon nga
paghalad.



X

Dimas

Sin-o bala sa aton
Ang indi kawatan?
Sang mga tini-on
Nga dapat
Sa Dios ginhatag.
Sin-o bala sa aton
Ang waay nagapangawat Sang
mga yuhom kag kalipay Sang
mga bata nga uhaw
Sa ginatudlo sang
Simbahan?
Sin-o bala sa aton
Ang wala makawatan
sang oportunidad nga
Sa katesismo matudluan
Sa kada pagkadto
Sa kapilya kag katedral,
Sa homiliya ni Padre
Kag ni Señor nga Obispo,
Sa simple lang nga pagabiabi
Sang kaparehas nga katoliko,
Sa prayer meetings
Nga pirme gina atendaran,
Sa kahigayunan nga
Kun tani mabatyagan si Kristo
nga
Malapit, inang halos kaluyo
Lang, bisan makadali,
Magsugilanon lang guid.
"Maswerte gihapon si Dimas,
Kaluyo lang guid niya
Naistorya, si Kristo nga
Naga antus man, nagbungat
Sang tug-an nga wala sing
katapusan
Bangud sa iya paghinulsol.

Ang katekista nga
mahinulsulon
Tampad sa misyon.
Amo ini ang
ikanapulo nga
Krus sa dalan
Sang katekista nga
alagad
Mapuslanon nga
paghalad.

XI

Gintugyan




Ang pagka-katekista
Kag ang pagsalig nga ginhatag
Ang pahanumdom nga
ginpabutyag
Mabug-at nga responsibilidad
Para sa gihapon mangin
buhi, Ang kada ginatudlo
sang ebanghelyo
Kada istorya sang bibliya
Kada tradisyon nga
ginapadayon,
Kada sugilanon sang pagka-
matinuohon
Kaupod ang pag-ubay
Sang Apostol nga si Juan
Para mapalapit kay Hesus
Nga iya abyan.
Kag lalang ang paghigugma,
Sang aton lloy nga si Maria,
Napun-an siya sang kasulub-on,
Napilasan ang balatyagon
Sa kasakit sang Iya Anak
Nga nasaksihan sing malisod.
Kay Maria gintugyan
Ni Hesus ang Simbahan
Sa tini-on nga naga-dulom Ang
tanang nga paglaum
Sa nagapamahug nga pagkadula
Sang kabuhi sa duta.
Ang katekista maka-Maria
Pirme kaput ang rosaryo
Sa sosyedad nga magamo
Ang katekesis iya gina-amba.
Amo ini ang ika-onse
Krus sa dalan
Sang katekista nga-alagad,
Mapuslanon nga paghalad.

XII

Pagkamatay

Madamo guid nga beses
ginapamalandungan
Ang pagkamatay ni Hesus
Sang mga katekista nga-
alagad.
Sa adlaw-adlaw nga krus
Nga ila ginapas-an
Para sa ang misyon
Nga mapa-ambit ang
pagpanudlo
Ni Hesus nga buhi.
Apang ang pagkamatay
Sang Ginoong Hesukristo,
May pagpanudlo man nga
lalang
Nga ang tanan may ara
pakadtu-an,
Ang kada-isa may pala-
abuton,
Nga bisan ang kabudlay
May katapusan
Kag ang aton pangamuyo
Nga sa katapusan sang tini-
on,
Nga sa katapusan sang tini-
on,
Mahugot nga pagahakuson
Ang promisa nga
masagamsaman
Ang langit nga tug-an,
Kay natuman na guid man
Ang misyon sa katapusan
Nga sa pagpasalamat napun-
an!
Amo ini ang ika-dose nga
Krus sa dalan
Sang katekista nga alagad,
Mapuslanon nga paghalad.



XIII

Pagpahigda

Ang kabuhi sang katekista
Hambal sang kadam-an,
Sa kalipay napun-an
Ang kalipay nga nagikan
Sa bug-os nga kabubut-on
Sang pag-alagad nga
tampad
Ang tingog pagtu-o
Ang tunog kabalaka
Ang tono pagpalangga
Ang kanta paghigugma.
Sang ginpahigda si Hesus
Ginhutikan Niya
Ang mga katekistang-alagad
Nga sa Iya pagpahimunong
Sa makadali nga pagpiyong
Sang tatlo ka adlaw nga
kadulom-
Mag-amba sang himaya kag
Pagpasalamat,
magpamalandung
Kag magpabakud sang buot
kag
Magtu-o nga sa bisan ano
nga pag-antus kag
Kadulom, may tug-an nga
Kabuhi kag kapawa.
Amo ini ang ika-trese nga
Krus sa dalan
Sang katekista nga alagad,
Mapuslanon nga paghalad.



Photo credits
Stations of the Cross Coloring Pages <http://www.thecatholickid.com/stations-of-the-cross-coloring-pages/>

Copyright 2020
Layout design by *Joanne C. Santiago*
Translation version layout by *Ma. Danielle Villena*

XIV

Pagkabanhaw



Ang ginpili nga misyon amo
Ang pagka-katekista
Pero sa pagkamatu-od -
Ginpili sila sing maamligon
Sang Dios nga Makagagahom,
Agud mangin kadampig
Sa matinguha-on nga pag-
atipan
Sang Simbahan nga palangga.
Buhi-on ang nagpangluya nga
pagtuluohan
Kag sulit-suliton
Indi mag-untat,
nagpahanumdom
Sang mga panudlo nga
mapuslanon
Nahanungod sa pagpreparar
Sa liwat nga pagkabanhaw!
Ang katekista nga manggad
Sang aton Simbahan.
Amo ini ang ika-katorse nga
Krus sa dalan
Sang katekista nga alagad,
Mapuslanon nga paghalad.

*Sinulat sa Sun Residences at UST
Chapel,
April 19, 2019, Biyernes Santo, mula
10:00 ng umaga hanggang 3:00 ng
hapon.

ANG DALAN NGA KRUS SANG KATEKISTANG-ALAGAD
MGA MGA BINALAYBAY NGA NATUKIB SA NATIONAL CATECHETICAL STUDY (NGS) 2016-2018
ni *Clarence M. Batan*, University of Santo Tomas
Ginluban sa Hiligaynon ni *Ray Bofill*, University of Santo Tomas at *Fr. Nelson S. Plohimon*, OAR,
Archdiocese of Cebu

